

Komisioni për Mbrojtjen e Konkurrencës, në bazë të nenit 28 dhe nenit 19 paragrafi (1) pika 2) të Ligjit për Mbrojtjen e Konkurrencës (“Gazeta Zyrtare e Republikës së Maqedonisë” nr. 145/10, 136/11, 41/2014, 53/16, 83/18 dhe “Gazeta Zyrtare e Republikës së Maqedonisë së Veriut” nr. 208/24 dhe 16/25), duke vepruar mbi njoftimin për përqendrim të parashtruar nga shoqëria Ndërmarrja për Telekomunikime Telekom Serbia, shoqëri aksionare Beograd, me seli të regjistruar në rrugën “Takovska” nr. 2, Beograd, Republika e Serbisë, përmes personit të autorizuar Ognjen Trajkovski nga Shkupi, në seancën e mbajtur më 17.09.2025, solli këtë:

AKTVENDIM

1.Konstatohet se përqendrimi me të cilin Ndërmarrja për Telekomunikim Telekom Serbia, shoqëri aksionare Beograd, me seli të regjistruar në “Takovska” nr. 2, Beograd, Republika e Serbisë, do të fitojë kontroll individual mbi Shoqërinë për Shërbime Kabllore të Telekomunikimit KATV SHPK Çoka, me seli të regjistruar në rrugën “Marshala Tita” 22a, Çoka, Republika e Serbisë, edhe pse bie nën dispozitat e Ligjit për Mbrojtjen e Konkurrencës, nuk do të ketë si pasojë pengimin, kufizimin apo shtrembërimin e ndjeshëm të konkurrencës efektive në treg ose në një pjesë thelbësore të tij, veçanërisht si rezultat i krijimit apo forcimit të pozitës dominuese të pjesëmarrësve, **dhe është në përputhje me dispozitat e Ligjit për Mbrojtjen e Konkurrencës në kuptim të nenit 19 paragrafi (1) pika 2) të Ligjit për Mbrojtjen e Konkurrencës.**

2.Detyrohet parashtruesi i njoftimit për përqendrim të paguajë taksë administrative për njoftimin për përqendrim në shumë prej 6.000,00 den. dhe për aktvendimin në shumë prej 30.000,00 den., sipas numrit tarifar 34 të Ligjit për Taksat Administrative (“Gazeta Zyrtare e Republikës së Maqedonisë” nr. 17/93, 20/96, 7/98, 13/01, 24/03, 19/04, 61/04, 95/05, 7/06, 70/06, 92/07, 88/08, 130/08, 6/10, 145/10, 17/11, 84/12, 192/15, 23/16 dhe “Gazeta Zyrtare e Republikës së Maqedonisë së Veriut” nr. 151/21) në llogarinë e Buxhetit të Republikës së Maqedonisë nr. 100000000063095, llogaria për pagesë 840...03161, kodi i të ardhurave dhe programi 72231300.

3.Padia për fillimin e kontestit administrativ nuk e shtyn ekzekutimin e aktvendimit.

Arsyetim

Në përputhje me nenin 15 të Ligjit për Mbrojtjen e Konkurrencës, më 25.08.2025 në Komisionin për Mbrojtjen e Konkurrencës u dorëzua njoftimi për përqendrim nga Ndërmarrja për Telekomunikim Telekom Serbia, shoqëri aksionare Beograd, me seli të regjistruar në rrugën “Takovska” nr. 2, Beograd, Republika e Serbisë, me të cilin Ndërmarrja për Telekomunikim Telekom Serbia, shoqëri aksionare Beograd, do të fitojë kontroll individual mbi Shoqërinë për Shërbime Kabllore të Telekomunikimit KATV SHPK Çoka, me seli në rrugën “Marshala Tita” 22a, Çoka, Republika e Serbisë.

Komisioni filloi shqyrtimin e njoftimit ditën e pranimit dhe, bazuar në të dhënat e dorëzuara në njoftim dhe në dokumentet përcjellëse, konstatoi sa vijon:

Aktivitetet kryesore të ndërmarrjeve të përfshira

Ndërmarrja për Telekomunikim Telekom Serbia, shoqëri aksionare Beograd, është operator i shërbimeve dhe rrjeteve të komunikimeve elektronike, i regjistruar për telekomunikime kabllore, dhe ofron shërbime të telefonisë fikse e mobile, internet dhe multimediale në territorin e Republikës së Serbisë.

Telekom Serbia ka një shoqëri të lidhur në territorin e Republikës së Maqedonisë së Veriut:

- Shoqëria për tregti dhe shërbime MTEL SHPKNJP Shkup, me seli të regjistruar në rrugën “Maksim Gorki” nr. 11/1-3, Shkup, Qendër, në Republikën e Maqedonisë së Veriut, është e regjistruar për veprimtari të telekomunikimeve me tela, gjegjësisht për ofrimin e shërbimeve vijuese: rrjet publik radio-komunikimi, akses me brez të gjerë në internet, shërbime ndër-operatorësh, shërbime telefonike publike të disponueshme në rrjet publik të komunikimeve mobile, ri-emitim të shërbimeve të programeve televizive dhe shërbime satelitore.

Shoqëri e lidhur me Shoqërinë për tregti dhe shërbime MTEL SHPKNJP Shkup është Shoqëria e Telekomunikimeve MTELMOBIL SHPKNJP Shkup. Shoqëria e Telekomunikimeve MTELMOBIL SHPKNJP Shkup vepron në tregun për ofrimin e shërbimeve të komunikimeve elektronike mobile (shërbime “prepaid”) dhe nuk u ofron përdoruesve të saj final shërbime mobile “postpaid”. Shoqëria e Telekomunikimeve MTELMOBIL SHPKNJP Shkup është operator virtual mobil i rrjetit (OVMRR) në tregun maqedonas të komunikimeve elektronike dhe ofron shërbime kombëtare, ndërkombëtare dhe roaming për thirrje zanore, SMS dhe internet.

Gjithashtu, person i lidhur me Ndërmarrjen e Telekomunikimeve Telekom Serbia, shoqëri aksionare Beograd, në territorin e Republikës së Maqedonisë së Veriut është Shoqëria për tregti dhe shërbime TOTAL TV SHPK Shkup (“TOTAL TV DOO Shkup”), me seli në Bulevardin “Partizanski Odredi” nr. 17, 1-001/Shkup – Qendër, Qendër, në Republikën e Maqedonisë së Veriut, e regjistruar për veprimtari të telekomunikimeve satelitore.

Shoqëria për Shërbime Kabllore të Telekomunikimit KATV SHPK Çoka është operator i shërbimeve dhe rrjeteve të komunikimeve elektronike, e regjistruar për ofrimin e aksesit në internet, shërbime interneti dhe shpërndarjen e përmbajtjeve mediatike.

Shoqëria për Shërbime Kabllore të Telekomunikimit KATV SHPK Çoka nuk ka subjekte të lidhura juridike në territorin e Republikës së Maqedonisë së Veriut dhe nuk ka realizuar të ardhura në këtë territor.

Komisioni konstatoi se përqendrimi i njoftuar bie nën dispozitat e Ligjit, sepse plotëson kushtet nga neni 12 paragrafi (1) dhe pika 2) dhe nga neni 14 paragrafi (1) pika 1) dhe 2) të Ligjit për Mbrojtjen e Konkurrencës.

Komisioni, duke pasur parasysh kriteret nga neni 17 paragrafi (2), paragrafi (3) dhe paragrafi (4) i Ligjit për Mbrojtjen e Konkurrencës dhe pikën 6 b) të *Udhëzimeve për përcaktimin e rasteve në të cilat gjatë vlerësimit të përqendrimeve Komisioni për Mbrojtjen e Konkurrencës zakonisht do të konstatojë se ato janë në përputhje me Ligjin për Mbrojtjen e Konkurrencës*, vlerësoi se përqendrimi i njoftuar, edhe bie nën dispozitat e Ligjit, është në përputhje me të, sepse nuk do të ketë si pasojë pengimin, kufizimin apo shtrembërimin e ndjeshëm të konkurrencës efektive në treg ose në një pjesë thelbësore të tij, veçanërisht si rezultat i krijimit apo forcimit të pozitës dominuese të pjesëmarrësve.

Duke pasur parasysh këtë vlerësim të përqendrimit, Komisioni vendosi si në dispozitivin e këtij Aktvendimi, në përputhje me nenin 19 paragrafi (1) pika 2) të Ligjit.

Në përputhje me nenin 53 paragrafi (2) të Ligjit, padia nuk e shtyn ekzekutimin e aktvendimit.

Udhëzim për mjetin juridik:

Kundër këtij vendimi mund të ngrihet padi për fillimin e kontestit administrativ pranë Gjykatës Administrative në afat prej 30 ditësh nga dita e pranimi të aktvendimit.

KOMISIONI PËR MBROJTJEN E KONKURRENCËS

KRYETARE

Mr. Малинка Силјановска Николиќ